

漁

石

集

三





漁石集
(三)

唐龍集

王雲五主編

叢書集成初編

漁石集

三冊

中華民國二十四年十二月初版

集者

唐

龍

發行人

王雲五
上海河南路

印刷所

商務印書館
上海河南路

發行所

商務印書館
上海及各埠

章

漁石集卷四

七言古詩續編

紅石峽歌

嘉靖壬辰七月既望。提兵登峽鎮守。趙中侍月賓于中丞在焉。

黃河十月風獵獵。天光黯淡水聲咽。蛟鼉攣拳縮如蝟。波濤震蕩湧爲雪。牛心山前百草腓。羊圈津口冰山結。鐵騎十萬聲雄號。赤睛黃鬚呼天驕。竿頭直指武花月。革帳斜捲狼山颺。蹈冰渡河如走坂。須臾千里騰□□。黃沙熒熒獵火發。皂雕矯矯胡雲歆。千騎萬騎馳且突。長兵短兵相摩擊。口吹牛角生捉軍。頭插鷗毛死攻壁。將軍忙解黃金印。半夜開門傳羽檄。邏戍抽身匿草間。校尉守陴無顏色。奏書朝達明光宮。天子特命司馬龍。提兵早向玉塞中。震懼強虜斯爾功。微臣敢不奮孤忠。彭彭十乘啓元戎。分合疊張貔虎陣。出入不避豺狼鋒。健兒鼓行一當百。猛將橫槊氣如虹。再接再厲賊膽落。屢戰屢克邊塵空。紅石峽對駱駝峯。朱巖丹嶂凌蒼穹。雲屯密結細柳營。日出高掛扶桑弓。中侍矍鑠冠戎貂。中丞慷慨車蟠熊。佛閣神壇列虎帳。從來樽俎能折衝。玉關嶺窄天險設。雪瀾澎湃軍聲洪。塞草青青邊馬秣。耕牛渴飲長城窟。禾黍萬頃連秋雲。邊頭三月狼煙滅。直欲上取一丸泥。應弦落閉陰山穴。單于大旆不敢東。年年沙場息戰伐。

得勝坡歌

坡在隆德縣西二十里。嘉靖壬午春。予方督學政。夏四月二十八日。由靜寧之平涼校士。道經坡下。見匈奴一羣呼譟。坡上吏卒駭怖逸去。從者惟通判張祚與諸生數十人。擁輿而趨。虜亦不敢逼。壬辰秋。來總制邊務。甲午春二月十七日。往甘肅覈勘夷情。再過坡下。郵夫指曰。此往年軍門遇敵地也。感而賦此。

昔年挾策過坡下。坡上敵騎音愴惴。身騎黃馬牽赤馬。手耀長兵懷短兵。射鵬擊鵠羽如雪。柴塘烽堠煙青熒。亟呼吏卒俱遁去。相從惟有青衿生。郡中別駕亦義士。左馳右驟護我行。褰帷露冕但長嘯。慷慨有懷期請纓。徐驅示暇二十里。日落孤旆臨荒城。匈奴勁勦不敢逼。父老踴躍爭相迎。椎羊炮鷄與舉醕。開襟一飲三十觥。十載往事真悠悠。又捧天書急西征。魚麗鳥翔列陣勢。鉦鳴鼓應揚軍聲。前時我遇匈奴避。今日匈奴聞我驚。重過坡下一愴然。寒雲宿霧蒙榛荆。

一丈紅歌

開府羅植葵花一本。色丹。長丈餘。矯矯特立。爲賦一丈紅。

邊城三月如嚴冬。四月飛雪五月霜濛濛。園林慘淡花木疎。碧桃緋杏無春容。幕府高枕北地寒。轅門直對崆峒雄。睠茲珍草邁孤芳。麗庭拂牖青葦葦。修幹翹翹浥靈露。密葉撼撼搖光風。六月開花如渥丹。倚空玉立一丈紅。葉垂衆羨庇足智。花明白許向日忠。微臣矢心事明主。寸丹耿耿花相同。

涼州行

涼寇亦卜刺一枝。逃海上爲穴。呼曰海魯。西域土魯番回夷。占據哈密城。此皆邊陲之隱患也。黃沙浩浩西涼州。沙雲長結沙草愁。三月青陽照六合。此地蕭瑟渾如秋。古堠煙沈雪片落。白水波瀾霜花浮。桃不能紅李不白。楊柳初發青絲柔。鶻鵬戴勝音寂寂。雨中沙鳥鳴啁啾。腐儒膽氣麓且豪。長歎河窟屯氈裘。手捧西征銅虎符。虜兵十萬揮矛收。請纓已棄終軍繻。投筆敢慕班超侯。直擬坐撻克汗背。還期生獻月氏頭。紫駝赤鬣黃金絡。據鞍鳴鑣何矍鑠。旌干直指武威圻。關門早起金城鑰。手把寶劍登將壇。身著輕裘上鈴閣。虜人飛揚射獵者。禽奔獸駭遁毳幕。邊塵不動邊月明。健兒城頭偃鼓角。近年逸虜逃遺踪。捲營踰伏青海中。西域回子好弄兵。玉門關外烽火紅。江零灘結犬羊穴。哈密城作豺狼宮。嫖姚將軍一箭雄。祁連山高可掛弓。崑崙深澗水一勺。匯作黃河千頃洪。欲取長瀾灑沙漠。蕩洗回部腥膻風。

元鶴歌

羅得海鳥風格奇。一雄一雌常不離。置之庭除爲拂羽。閑心頗與野性宜。渴沃清瀾饑白黍。雕籠錦絛渾忘施。昂昂矯矯亢膺立。燕雀鷄鶩不敢欺。一聲長唳海月出。兩翼旋舞天風隨。意態常似戀秋壑。飲啄猶不忘青芝。一日雄者翺且翔。雌者彷徨亦從之。逍遙正快九天思。高潔雅稱三島姿。甘菊花開我獨酌。喬松枝老誰其栖。渺渺青雲不可招。城頭惟聞烏夜啼。

百歲歌

湯溪洪氏母壽百歲。既恬且康。初度之辰。餽我太夫人以芬殺佳果。誠願同升壽域千斯年。作百歲歌。

南極壽星炯靈珠。五夜高照婺女墟。灝氣翔鸞降金母。祥風馭鶴來麻姑。金華之山本壽鄉。赤松白石非虛無。洪家阿母陽阿仙。長綰雲珮飄霞裾。百歲春光來未已。轉見童顏與兒齒。江魚竹笋日健餐。還向懿筐理絲枲。新婦房中速杼機。鷄鳴卽興夜分寐。手牽元孫口含飴。不獨但見曾孫喜。海日朝出扶桑顛。蟠桃花紅初度懸。瑤宮玉檢青鳥傳。雲母屏開羅綺筵。珍羞遙分我母前。觴舉八座春酒鮮。忙著綵衣舞僊僊。我母阿母皆千年。

直氣歌

友人方山黃子。爲武選郎。廉潔正直。惻惻務執法。士論高之。乃拜閩藩參議。艤舟蘭皋。訪予於山中。以伸良晤。旣而曰。何以壯此行也。作直氣歌。

天生傲吏不常有。直氣桓桓薄牛斗。落落咄咄吾何嗟。許身許國真不負。守官惟奉天子法。綜選峻執王綱紐。幕府較若纍纍功。衣笥獨祕若若綬。孰云彼錢能通神。我視十萬秋毫輕。孰云彼勢可炙手。我視炎門還若冰。明庭正直鬼神赫。赤管森肅風霜生。歲寒松柏不改色。拔雲砥柱中流撐。汲黯方擬禁闔留。望之忽報三輔試。倒屣相迎握手懽。傲吏自來非凡吏。飛觴交錯山花開。短榻初下明月至。行矣何以酬國

恩長指一身惟直氣。

後屏歌爲盧諫議賦

括蒼山峙牛女東。方壺圓嶠盤其中。一峯秀出仙掌劈。削成聳立如屏風。列嶂擁戶紅塵隔。疊巘倚空青嵐重。綵錯石間現雲母。碧圍水面環芙蓉。峭拔迴比匡廬奇。幽寂絕勝城南雅。結茅三間峰之前。主人自是讀書者。牛籤萬卷可汗牛。紫毫千言直倚馬。灝氣秋看天街涼。翠花晚對筠牀洒。一邛一壑何足營。彈冠束帶辭山靈。猿鶴別去洞窗豁。松桂交蔭巖屏扃。中流特雄砥柱操。青雲遙起太山名。千仞翱翔鳳凰下。九苞燦爛朝陽鳴。

五言律詩

桃源宮阻雨

曲曲仙人逕。青驄此暫遊。相逢春正好。其奈雨爲憂。花發千門漲。雲深四月秋。道人名不識。爲我指丹邱。

長沙道中

慈母六旬至。遊子萬里行。鶯花過四月。燈火入孤城。人語程程別。鄉心夜夜驚。尺書飛不到。無限倚門情。

察院中有草亭。春山所構。公暇小憩其間。

簿書亂不帙。聊以息虛亭。鶴映松花白。山含柿葉青。光陰雙去鳥。天地一浮萍。酒盞空涓滴。春來日日醒。

登太華山

法界知名久。南荒第一奇。簿書仍太急。杖履故應遲。空洞雲無礙。危崖花欲敲。溼然下清露。老鶴踏松枝。

雪

白雪浮清曙。輕盈接混茫。慈親髮可照。諸弟被應僵。已近三年客。還停萬里航。山靈深詫我。松菊正淒涼。

石池

石破殘山磧。泉分漲海波。清虛渾澗壑。浩蕩亦江河。鳥浴蘋花亂。魚跳竹色多。臨池頻照影。回首忽狂歌。

夢漁

花影日欲暮。天遠江放清。船頭春夢好。沙上釣絲輕。細雨孤帆落。疏鐘兩岸明。覺來窗月白。渺渺五湖情。

除夜二首

爆竹夜偏驚。鐙花冷更明。今年惟此夕。遠客不勝情。殘雪春湖色。寒雲白鴈聲。夷歌聲一概。聊以答昇平。獨客守殘歲。黃柑共白醪。星臨河影動。風入鼓聲高。萬里雙蓬鬢。三春一絮袍。江梅花正凍。春色尙蕭騷。

聞鳥

南山有好鳥。地主不知名。自逐春風至。相依綠樹鳴。青青山色暮。滾滾客愁生。平仲花將落。只宜三兩聲。

聞禽言有感

不如歸去好。還尋老樹柯。葉密庇風雨。花深踈網羅。饑窺朱果落。飛愛綠蕪多。喚起羈人思。月明聽棹歌。

鶯

交交復恰恰。高樹頻啼鶯。自入明皇苑。誤畱公子名。澗邊幽草恨。谷口落花情。聽到無聲處。青山月正明。

雲南察院草亭漫興三首

草亭春寂寂。野性頗相宜。井近硯池滿。雨來書榻移。幽花依石發。過鳥下簷窺。乘興入深竹。寒光滿素絺。

黑龍潭

天光蕩波影。杳杳黑龍堆。潛魚不可釣。見人還自來。盤渦動雲雨。細沫起風雷。石竇流涎出。還堪發玉醅。

雨得鳴字

四月黃梅雨。落落疎復鳴。牀頭孤客耳。夜半一池聲。雲出白龍井。天低金馬城。村村田鼓急。牛犢及時耕。

五月朔雨至望止。病次見月四首。始喜而終感焉。

積雨空臺夜。明月臨我書。客身病亦起。短髮落還梳。榻靜竹光入。窗寒樹影虛。清輝頗無限。萬里共山居。

藹藹月華清。無風靜夜生。臺端頻眺望。雨後更分明。水白蛟龍喜。天空鳥鵲驚。中庭有雙桂。花發露盈盈。

院中桂花。丙子年六月開。丁丑開于七八月之間。今五月開矣。

月色映疎雨。悠然晚景晴。蒼蒼升古塞。靄靄過高城。牛渚已陳迹。南樓空復情。傷神豈秋夜。此際更淒清。

東坡詩話云。春月和悅。秋月淒慘。少陵亦云秋月更傷神。

木高煙泯泯。月吐海門東。荻岸雪霜裏。竹埤秋水中。陰晴千里異。憂樂幾人同。舟楫歸何晚。浮生嘆轉蓬。

十六夜月鷄鳴雨

涼月度清漢。邊城暑亦秋。鏡飛闕影動。珠孕海光流。今古千年嘆。關河萬里愁。鷄鳴井陌曙。風雨轉悠悠。

雨懷三首

細細風前斷。疎疎葉上聞。亭臺隱山霧。城郭進溪雲。轉益鄉愁亂。還憐世事紛。早秋身似鴈。天外獨思羣。
萬樹秋雲裏。孤山細雨時。江泥沾落絮。花霧困遊絲。懷抱爲誰好。親朋已久辭。東溪讀書處。一水護青帷。
六月雨中過。萬山雲裏寒。城臺秋夜靜。鐙火客身單。君飯每思報。家書時檢看。夜眠渾不着。新鴈度江干。

會請桂洲先生于貢院

粉院論文地。佳辰聚客星。澗羹秋鰕細。野釀早瓜馨。雲氣雨中白。山光鳥外青。杯乾已三月。莫遣此時醒。

桂洲先生過臨次韻

臺署柏陰陰。清居喜過臨。美花開竹裏。明月在天心。物色知人意。君詩向我吟。涼風帶飛雨。寂寂起松音。

遊登圓通寺次崆峒韻

物外暫招尋。惟聞鐘磬音。松蘿栖梵影。水石定禪心。雲去蒼崖溼。僧歸紫逕深。滇池風雨至。正好聽龍吟。

郊行

雨過涼風起。泠泠吹客懷。水邊蠻語異。屋上海氛堆。魚躍稻初出。山青花不開。郊垞異城市。驄馬故徘徊。

卽事

歲月馳何疾。音書靜不聞。別離常把卷。四十始能文。烹筭廚人拙。尋書稚子勤。城煙對江雨。鄉國思紛紛。

別澹庵

六十謝軒冕。無求心自閑。有時過我地。終日說山間。白髮抱黃口。清貧多好顏。悠然三徑裏。細雨菊花斑。

別絜齋

掖垣多諫草。五十歸林泉。薄薄山百畝。疎疎屋一椽。殘棊榕葉暑。嫩醖菊花天。絕口人問事。于今又十年。澹庵絜齋。黔告老大夫也。予居黔二年奇。二大夫弗易及門。卽及。未嘗論官府政。殆所謂鄉先生者哉。將行。詩爲別。

遐思

圖書多暇日。江海有遐思。諫草三千字。憂端十二時。山居夢頻到。秋色鬢先知。春日歸天仗。花磚引漢儀。

鶴野爲郭秋官賦

古野松花白。徘徊若欲忘。天高秋思遠。水感夜聲長。花鴨羞同食。虞羅虛自張。遙遙度華海。月色正蒼涼。

次陽明先生遊玉笥山

萬石結巖林。縈迴道院深。遠天雲漠漠。古洞雪陰陰。壁上龍蛇跡。水邊鐘磬音。山人應好道。杖履故追尋。

吉州察院見菊花

步履深臺晚。悠然見菊花。山中忘臭味。霜下嘆繁華。草色從荒徑。風光似我家。繡衣佳醞竭。樂事但烹茶。

冬至

天涯長至日。鐙下遠遊人。薄祿家猶賴。休官語未真。歲時常不住。形影自相親。幸有梅花發。清癯可結鄰。

病況

微軀常抱病。短髮不梳頭。冬月竹陰薄。江城樹色幽。風光憐去鳥。世事嘆虛舟。竊祿久何補。到家方免愁。

夢漁酬棠陵子

湛湛春湖淨。悠悠午夢清。碧蕤山雨溼。白舫渚風輕。沫動松鱸出。巖然楚竹明。應憐塵土裏。不斷水雲情。

羅溪舟中

開篷放明月。溪色上人衣。百里郵程遠。三更候吏稀。殘秋猶淅瀝。新曙正熹微。忽憶華川裏。水深鱸鰕肥。

次黃太常蓮峰林居韻二首

頭枕石嵯峨。長纓濯碧波。逕迴人迹少。山靜鳥聲多。世事真碁局。生涯但釣簑。而今從政者。願聽楚狂歌。

林下無人到。去畱惟白雲。栽松邀老圃。失鶴問前村。惆悵頻瞻宇。歸來擬杜門。爲君一乘興。樽酒解愁□。

冬日

帶雨雪難集。經冬歲易殘。鵲聲先客至。竹色上衣寒。見怪嗟吾道。虛糜愧此官。出門何所適。惟有五湖寬。

介溪太史日擬北行弗果。詩至約春初于南浦論別。用韻勸之行。介溪新構面鈴山甚奇。

家對玉峰奇。畱連命駕遲。雲生琴石潤。月過酒樽移。世道憂方重。官情懶未宜。初春雪水湧。南浦待舟時。

正德辛巳正月十二日。偕白浦南雋。飲于陽明公處。卽暮張鐙。因作十二夜鐙詩。

令節新晴際。方城缺月中。亂離一戰息。鐙火萬家同。試聽閭閻下。爭歌使相功。云來遲數日。井絡盡爲烽。

雋溪爲南雋希會作

道人愛清勝。家住雋溪頭。月瀨娟娟淨。風潭泯泯流。鳩鷗依石渚。茨竹映沙洲。會見名成隱。長乘范蠡舟。

止弋陽行臺時鵝湖大學士先生來訪陪遊溪寺

乘興臨公館。尋幽到上方。匙翻雪黍白。酒帶野泉香。佛閣臨溪迴。禪房過雨涼。袈裟採藥去。不拜繡衣郎。

螺川夜行

天晴過嶺北。日暮轉湖西。月色白於水。風聲響若溪。客懷秋耿耿。人語夜淒淒。感激披衣坐。中流聽早鷄。

溪亭小憩

緬焉滯行役。欣爾息溪亭。衣動竹光滿。座幽山意冥。風湍厲清響。嶠鶴矯修翎。倏起高栖興。浮名似水萍。

金城寺

水石城西寺。雲霞雨後天。薄遊經此地。出餞動諸賢。溪映山光幻。花連竹色然。風塵慚鹿鹿。未暇叩空元。

韋曲

韋曲春猶遠。閑來騎馬過。風花隨去鳥。晚色并疎蘿。野闊浮雲薄。江鳴白露多。古今成底事。滾滾亦江河。

薦福春宴次彭衙韻

山迴雲屏靜。郊迴雨徑斜。閑僧忘歲月。老鶴識煙霞。勝地宜春宴。新醪漬白花。西林留日影。客興正無涯。薦福春宴。平田不赴。投以詩。次韻邀之。

林沼居偏寂。遂爲魚鳥知。宴開芳寺曲。花發暮春時。懶出空鋤逕。相思數寄詩。還當騎馬往。竹裏共銜卮。輞川春雨次彭衙韻二首

風來春雨急。沙走暮江喧。野水流漁市。山雲進郭門。蛟光還隱見。花候自寒溫。忽憶田園好。柴桑蔭遠村。獨坐春城晚。溪雲送雨聲。忽於花外至。轉向席邊鳴。寂寂山光暝。油油草色生。濁醪聊自醉。掩耳世間情。

灞橋

寒天雙劍發。遠水一橋橫。漢墓生荆棘。秦宮化甲兵。雲垂村市暗。雪照浦沙明。橫筆誰題柱。臨流我濯纓。終南山次灞江中丞韻

崖林蔚復岑。臺閣迴還深。雲雨半空落。鷗鷺五月吟。圖書有餘暇。杖履故追尋。命酒不知暮。碧桃花滿林。欲叩元元境。道人門正開。洞中雲似雪。樹杪水如雷。白鶴靈先到。青牛隱不來。東風渾有意。滿路長莓苔。望仙遊院仙遊在終南山西三十里。勝地也。

仙遊不可到。渺渺興無窮。赤峽青冥外。飛泉亂雨中。衰年厭奔走。此地稱疎慵。少待月華上。來看石上松。咸陽渡渭

朝發長安道。暮臨渭水濱。浪排飛峽雨。湍擊度川雲。樓閣沈秋影。鯨鯢吐夜文。中流頻擊楫。感激思紛紛。
邠州

客路千山外。春光三月中。獨憐鄉井異。猶善歲時同。門漲桃花雨。溪含杜若風。依然看燕子。何以附冥鴻。
景隆池俗呼九龍池。唐花萼樓。沈香亭基俱在焉。

九龍池上酌。感慨奈愁何。花萼蒙荆棘。沈香沒薦蘿。離離秋雨館。莽莽夕陽坡。往事同棊奕。愁聞禾黍歌。
再宴薦福。每歲春三司會請卿士夫于此。初至猶行之。後亦漸落莫矣。

南郊遺古寺。春日集芳賢。林薄花然檻。巖陰竹覆筵。禪心澄水石。佛像幻雲煙。滿地月光白。青驂樹裏旋。

驪山

曉過驪山下。喚生千古愁。催花媚妃子。舉火戲諸侯。石上浮雲過。松間宿雨留。風流盡塵土。景物自悠悠。

華清宮

三年頻去住。杯酒論興亡。草色瑤壇廢。苔陰繡嶺荒。高風悲羯鼓。宿靄隱霓裳。滿地惟流水。疎林又夕陽。
新豐市。鴻門在東。繡嶺在西。

華山

雪沒新豐市。當鑪數十家。煙樓團凍雀。風徑落飢鴉。慘淡鴻門劍。模糊繡嶺花。前朝物華盡。境土半蒹葭。
崔嵬凌地軸。混沌接天光。灝氣浮仙斗。融風鼓大荒。鶴音通海遠。芝草拂雲長。散髮希夷子。閑中笑我忙。

謁郭汾陽祠

出處心無繫。安危身敢當。主憂天寶亂。國難吐蕃張。百戰山河壯。孤忠日月光。風煙凝壁壘。花竹護祠堂。

謁韓文公祠

嘉靖甲申季秋十九日。宿於模糊郵亭。月光翕習。清風泠泠。乃夢周旋揖遜于公之前。公款款與語。明發行十里。秦嶺崑然。則公祠在。歛衽再拜。宛如夢中。夫豈偶然也。

縹緲雲爲境。嶙峋石結祠。丹心懸日月。吾道把旌旗。風雪藍關阻。波濤瘴海危。山深秋夢好。先已挹光儀。

鳳翔

渴馬飲清渚。飛旌閃白沙。風塵侵客鬢。伏臘換年華。雙峽長橋臥。孤峰落日斜。雪中行一月。今日見梅花。

岐山十里外有周公廟

古道黃雲裏。荒城落日前。巖林遺魯殿。畎畝變秦川。滴滴梧桐雨。離離禾黍天。鳳凰今不至。忽復幾千年。

岐陽道中懷康對山

楊柳柔堪折。岐陽三月春。回看讀書處。中有對山人。竹外青藜杖。風前細葛巾。應嘲遠遊者。鬚面受風塵。

汧陽

汧水翻高峽。吳山擁翠微。雪埋青兕叫。霞引白鴛飛。阮籍空悲轍。淵明早拂衣。百年將過半。何事尙忘歸。

隴州